

四庫全書

史部

欽定四庫全書

平定兩金川方畧卷一百十二

正月庚戌明亮舒常奏言帶石達爾圖木克什等處賊番負隅固守詢屢次投出番人皆稱賊番屢被勦戮日漸減少不過為移東補西之計近聞賊番以正地一路官兵業經撤出料不再來現將正地番衆俱調往綽甲斯布嚴防等語又據革布什咱土都司丹津扎布稟稱正地空虛愿派土兵數百

名覓間進攻與投番所供情節適相脗合臣等現
在密札永平寺駕馭丹津札布並諭綽斯甲布土
司雍中旺爾結等抽派土兵一千名擬於正地一
帶合力攻勦掩其不備既使調至綽斯甲布拒守
之賊顧慮家室人心解體且賊番又添一處防範
則帶石等處亦可與其疎懈於宜喜日旁進攻自
易為力奏入

上諭軍機大臣曰覓路進攻分掣賊勢固屬出奇制勝

之一法但奇正並用則可若專恃正地一路為得計而
於達爾圖宜喜等處概置不辦則斷不可雖賊番護
巢自衛守抗益堅我兵未能直進若用礮轟其碉卡
使日就傾頽賊衆自難久聚諒非力所難及明亮等
何竟不籌辦及此看來各路之兵惟阿桂一路最為
可望朕前日用硃筆標記之路似應得手歲內情霑
月餘為番境從來未有之事自係迅掃賊巢之佳兆
但番地氣候春間每多雨雪今已立春尤宜上緊籌

辦不可羈延坐待將軍等統兵勦賊冒險撲碉或致
稍有挫誤自非所宜若過於慎重不能制勝乘時亦
非良策著傳諭阿桂等當妥速行之

乙卯阿桂豐昇額色布騰巴爾珠爾海蘭察額森
特奏言查賊番因大兵深入巢穴將傾故自榮噶
爾博山梁以至沿河各處無不思竭力死守自宜
於相近賊巢處所乘間進攻以亂其心而分其力
查遜克爾宗之北地名什爾德其山梁近西苗則

大海之下有山腿兩支下山一為拉枯喇嘛寺一
為巴殲賊目桑結塌爾寨落該處山險雪深且與
大營相距甚遠賊或不復多為偹禦則潛師往襲
可期得手一得其地亦可進攻勒烏圍賊又必抽
撥多人往彼抵禦則於康薩爾及沿河一帶偹禦
稍疎可以相機攻進隨抽撥漢土官兵於十二月
二十一日由達爾札克繞過羅博瓦山後至喇穆喇穆
相近處暫為歇息二十三日酉刻官兵由薩斯嘉

赤溝繞進菑則大海向南山腿之下分為二股令普爾普瑚尼爾圖等分領一上攻菑則大海後面四處碉柵一順什爾德山梁前進攻搶菑則大海正碉又酌分兩隊五岱等從山梁之右進攻並邀截遜克爾宗賊衆來援之路福康安等從山梁之左進攻并為接應薩斯嘉赤溝官兵之用臣豐昇額親往調度至戌刻風雪忽作是處山溝數十里步步崎嶇官兵從林箐中攀援跳躍而行二十四日

辰刻抵蜀則大海向南山腿之下二股官兵直上攻
撲先將中間一柵攻克柵內賊番十數人均被殺
死其餘三處碉卡賊番尚在堅守至山梁上兩隊
官兵同時進撲賊番出碉衝突五岱所帶滿兵館
箭齊發殲斃十餘人餘仍入碉抵禦其隸對大營
之康薩爾山腿上第一碉座與官兵所拿木柵相
去甚近業已不拘日夜放礮擊打茲又於二十四
日丑刻派令烏什哈達等從正面山脊進攻我兵

撲至賊寨見寨外兩重壕溝設有兩層鹿角烏什
哈達等督兵進撲先將鹿角砍開越過一重壕溝
賊人鎗礮石塊交下官兵即用鎗箭擊射共見傷
斃賊番跌落寨牆之內因令官兵暫撤即在近硝
林箐內放鎗呐喊時作近撲之狀賊恐官兵再進
仍於牆內暗行預備臣阿桂臣色布騰巴爾珠爾
遂督官兵乘此時施放大礮見牆內賊番有隨破
衝去者計傷斃亦復不少其桑噶斯瑪特山腿

之下臣海蘭察臣額森特於二十一日晚間先令
土兵於附近甲爾納寨旁潛行設伏而令彰電等
分兵三隊進攻二十二日寅刻伏兵先上攻獲寨
前石十三隊官兵齊進卡內逸出賊番俱行殲殪
乘勢進撲碉寨而賊番鎗石已如雨下官兵連撲
數次不能久立是以酌撤臣等以此次攻打之後
賊番度我兵應稍休息更可出其不意又於二十
四日寅刻派額森特等分攻甲爾納左邊之來珠

寨臣額森特從中路下壓但是處距營盤稍遠逆
料賊必繞截我兵之後並派侍衛達蘭泰等於左
邊溝內設伏以便截殺及至官兵抵寨奮攻對面
山梁果有賊人抄下達蘭泰等伏兵突起箭斃數
賊餘多負傷奔竄而寨內賊番鎗砲益緊因亦將
兵暫撤先是十九日戌刻有賊番五十餘名分為
兩股於甘肅官兵卡旁潛越而上守卡外委張可
宣率兵迎擊立斃數賊而總兵保寧遊擊柯藩又

已聞聲往援分兵兩翼從石卡左右壓下賊不能
支即行敗竄帶傷扶輶而去者頗多又臣飭令

丹壩土兵於二十日往搶沿河賊卡亦殺死兩
賊奮力攻擊良久始回合計此數日打仗殺賊不
少弁兵間有陣亡受傷者統俟查明報部奏入

上諭軍機大臣曰此次官兵進攻殺賊頗為不少賊衆
自必膽寒若能攻克得式梯寨則進剿勒烏圍自然
勢如破竹阿桂等及此天晴雪少之時務須上緊籌

辦勿遲至二三月間雨雪甚多致有稽阻但亦不可不審度利害冒險撲碉惟當妥酌行之至于官兵分路進攻均距賊巢不遠而阿桂一路尤為得力現在賊番雖間有潛出滋擾之事我兵各處嚴為防範不可致有疎虞即或賊番死守官兵未能迅入諒賊勢不過延挨數月自必滅亡今事屆垂成萬無中止之理國家帑藏充盈軍需之用寬然有餘計兩次撥銀九百萬兩現已陸續到川約可用至四五月內設再

需用五六百萬方能蕆事亦所不惜想阿桂等必能
深體朕心斷不稍存畏難作輟之見但應將此意令
滿漢官兵及土司土練等一體聞知俾堅其心於事
更為有益

己未明亮舒常奏言臣等擬於正地一路乘機襲
取隨派馬應詔袁國璣等帶領預備綽斯甲布土
兵一千名並革布什咱隨征土兵三百名於十二
月二十八日起程約於正月初二日會齊該處土

卷之二十二

兵一同進勦奏入

上諭軍機大臣曰連日盼望各路軍報甚切至明亮之前奏分路勦賊之說雖非正辦若果因間得手亦足稍分賊勢乃今日奏到尚係發土兵前往正地起程日期而帶石軍營作何籌辦之處未據提及殊不可解明亮等前此雖奏稱賊番將山岡刨斷以阻官兵進路亦只帶石一處為然豈能將各處山岡盡行刨斷且金川番衆屢有投出之人伊等有路可來官兵

宜無路可往明亮何竟不設法進攻幾同守株待兔
倘賊番因我攻擊稍懈仍然偷暇耕作又可積糧持
久殊為非計至土兵前往正地不過如治病偏方未
可專恃明亮等若僅駐兵此處觀望不前何由得
進宜有已近賊巢復欲坐待經年之理雖冒險撲碉
非行軍所宜然亦宜可因噎廢食不思急圖進取明
亮等惟當鼓勵官兵激其勇敢之氣以期覓間得勝
斷不可稍涉遷延坐失機會各路將軍等均當一體

努力為之

癸亥阿桂豐昇額色布騰巴爾珠爾海蘭察額森
特奏言本月二十九日臣等以現當除夕賊度大
兵未必更來打仗出其不意於申刻令烏什哈達
帶兵突進果見各處賊番奔至碉前放鎗拋石烏
什哈達暫令官兵撤伏林箐臣等已先將各種礮
位排列並令隨營兵丁各舉鎗礮以待至時一齊
點放見擊倒轟去之賊甚多至正月初一日戌刻

復有賊八九十人來搶格爾提頭二十座十兵迎敵即行逃遁參領常存等察知賊係佯為退避當即設伏以備截殺初二日子刻賊果分路來攻伏兵齊起鎗箭並發賊多被傷顛躡扶掖竄逃查賊番等或為官兵進攻時所戮或於偷來滋擾時被殲又每日有為大破所擊者既已日形其少而窮餓之人又復紛紛逃出其力量日單以情勢度之斷不能久為支拒奏入

上諭軍機大臣曰賊人因巢穴已近捨死力衛亦理所應有官兵雖急切未能得手亦當隨時設法進攻擊其虛懈以期有濟斷不可稍涉因循觀望坐守相持久羈時日阿桂練習軍務且長於謀畫自必悉心籌度迅奏膚功惟望其努力妥為之

乙丑

上諭軍機大臣曰現在官兵進攻距賊巢不遠急盼捷音而各路進兵惟阿桂一路更為吃緊自谷噶進兵

以來處處仰攻屢獲大勝今自攻得日爾巴當噶等
處後兵皆從上壓下其勢更順理應乘勝速成何轉
至於棘手雖賊人因離巢益近死守益堅攻打原不
甚易阿桂等自當設法速攻不應頓兵坐待此時若
能添兵分進使賊人應接不暇自屬有濟但功逮垂
成無庸再為調發而京兵相距尤遠更屬鞭長莫及
因念賊勢已極窘迫未必復能逸出擾我後路今計
各處守兵尚多除大板昭一處地闊險要難於抽動

其旺保祿常青兩處所屬守兵內擇其無關緊要者
自可抽出千餘換至阿桂處守卡即於現在守卡兵
內換出可用戰兵千餘令豐昇額帶領另行覓路進
攻以掣賊勢或竟從功噶爾拉當噶爾拉擇路前進其地雖有
零星賊匪然防守不甚着意若由此直進攻其無備
亦是出奇之法但豐昇額既進之後又當為聲援之
策湏計能入能出不可瞻前而不顧後方為妥協著即
傳諭阿桂悉心妥酌能否如此辦理於事果否得

力一面籌辦一面奏聞

已已明亮舒常奏言

臣

等派土兵會攻正地初五

日夜抵該處忽有賊番百餘潛放夾壩猝然相遇

上前接仗殲賊數人餘即旋戰旋逃我兵追殺直

前賊番匿碉死守

臣

等思正地一路原擬襲其不

備今適遇夾壩賊番未能得手

臣

等當將革布什

咱添派土兵五百名調至軍營擬于喀爾提等處

先行攻勦奏入

上諭軍機大臣曰明亮等奏土兵進攻正地情形雖亦
殲賊十餘但係路遇夾擗之賊為數無多而于正地
一帶賊寨並未能攻得尺寸此路原止可為牽綴賊
勢之用並非實有可進之機今賊衆既已知覺防範
尤不可復致力于此徒勞無益明亮等自當就現住
之處覓間進剿不應株守坐待看來各路軍營光景
惟阿桂一路較可設法進攻朕亦惟阿桂一路是恃
著傳諭阿桂務須實力上緊籌辦以副朕懷

庚午阿桂豐昇額色布騰巴爾珠爾海蘭察額森
特奏言康薩爾第一碉屢經大礮轟摧已多塌燬
自應于此進攻當于初五日派令烏什哈達海祿
帶兵攻撲賊畜于碉卡之外挖有兩道濠溝且設
兩層鹿角官兵隨即砍開跳濠搶進直抵碉根奮
迅攻擊其露身碉前之賊既多被鎗箭擊斃賊惟
藏于空穴之地施放鎗石不遺餘力因令官兵略
撤據投出番人供稱是日碉內傷斃之賊共有三

十餘人至此數日內賊番屢來侵擾每次俱被殲
戮且一經官兵衝擊即行敗逃其為驅逼而來並
非齊心抗拒已可概見至近有投出之番人及脫
出之梭磨等處各番人妥為分別安插謹錄供詞
恭呈

御覽奏入

上諭軍機大臣曰此次攻打康薩爾第一碉座官兵等
頗屬奮勉至番地氣候冬令多晴入春即多雨雪朕

屢促將軍等上緊籌辦原慮因此或有阻滯耳今甫
交春令即已大雪恐愈遲愈多不可不早為之計況
雨雪雖云凍滑前此攻勦各處碉卡于雪中雪後得
勝者甚多可見事在人為阿桂等不宜以雨雪為辭
稍存自畫之見至康薩爾及沿河一帶地方賊畜因
逼近巢穴捨死堅守實堪切齒但閑投出番人克思
嘉等供詞稱賊人糧食只有苦蕎圓根其窘可知並
稱火藥將次用完土司分付頭人每家要交一觔硝

二兩礮等語如此豈能經久著傳諭阿桂等即當上緊籌辦設法竭力進攻以期迅速蕆事

同日

上諭內閣曰四川省軍營大功指日告成節次所撥軍需銀兩已足敷用至平金川于一切善後事宜不無尚需經費著于部庫內再撥銀五百萬兩即照上年戶部奏准之例令經由各省督撫派員承管遞送轉解交四川省藩庫存貯備用該部即遵諭行

臣等謹按官兵分道深入直壓賊巢雖賊眷悉力支拒冀得旦夕苟延而檻獸金魚滅亡可待大功無虞稽阻我

皇上霆威獨斷屢

諭在事諸臣軍需設末尚敷不惜多發帑金以期集勲藏事茲

特命部臣再撥銀五百萬兩貯川省以裕軍需而堅士心凡在戎行所以人懷致果而迅奏無前之偉

績也

同日郝碩奏言目下時屆春初天氣和暖沿途背
夫運送一切較去冬更為便捷查軍營及頭敵現
存米八千餘石自凱歌坪達爾札克至雪山根薩
爾赤各站現存米三千八百餘石梭洛柏古大板
昭撤拉等站共存米三萬三千餘石現在由資哩
楸砥滾運撒拉米石及長運大板昭梭洛柏古之
米每日約有六七百石以此源源運供軍儲自必

倍加寬裕至糧運經由各站道路橋梁有當添補修理者

臣

已行知各站員及早趕辦其自達爾札

克至凱歌坪係由山坡溝內行走彼時因冰雪未

化尚無阻碍今積雪漸次消融途間不無積水泥

潭處所背夫跋涉為艱

臣

隨督率該站員酌撥人

夫或改建高橋或墊鋪土石俾運送軍糧等項遄

行無阻奏入

上嘉之

壬申富德奏言正月初八日據駐守卡卡角之上
練阿拉報稱午刻有賊三十餘人從箐林潛下前
來竊劫阿拉帶兵迎擊而土練榮太等聞有鎗聲
俱來策應擊死賊番四五人被傷甚衆上山竄走
等語又初十日據駐守木古之總兵劉輝祖報稱
已刻有賊番四十餘人從箐林爬下窺探營盤劉
輝祖等帶兵往迎殺傷甚多驚慌敗遁等語又十
一日據派往穆當噶爾設伏之護軍參領德克登

額報稱午刻有賊番三十餘人從額寨山梁之石
窪潛行而下衝擊新豎木城德克登額帶領健銳
營吉林滿洲兵上前接戰而委署驍騎校瑪林保
亦將大礮對賊隊轟擊擊斃十餘人等語竊思賊
番情勢窘迫仍敢白晝侵擾營卡奸詭已極臣惟
有嚴守後路俟有可乘之隙即圖洗勦奏入

上諭軍機大臣曰閻富德此奏並未深入尚在坐守未
免過于慎重據現在情形成功在即一切雖當籌畫

萬全亦應奮力前進以圖迅速歲事豈但云謹守即有滅賊之理乎况時屆春令番地雨雪方多倘長此坐待即再守數月亦不過如是耳富德獨不計及乎目下賊番情勢窘迫已極尚數次潛出侵擾營卡我有大兵數千在彼不能相機設法殲戮賊衆豈不為賊衆所笑著傳諭富德但覓得路徑即速進攻不宜坐待

同日富德又奏言正月初八日投出金川番人申

札據供各路大兵攻圍甚急賊衆怕懼死守糧食
缺少欲投

天朝者甚多因賊目查察嚴密是以不能逃出索諾木
又復傳知百姓稱說綽窩斯甲遣回必係招降我
等爾等但加緊防守地方若再得一兩月即可完
事衆百姓聞此無不歡欣盼信等語臣思當此逆
番惶惑之時似應將計就計使其互生疑忌當將
先後投出番民飭令前往各處喊誘賊衆並繕寫

番字帖散插各處使賊衆得以傳播俟稍有可乘之隙迅即進攻奏入

上諭軍機大臣曰富德所奏相機離間之法止不過如治病偏方賊番狡詭異常未必肯為我反間所惑斷不可恃有此策轉致稍緩進攻且賊番鬼蜮伎倆無所不至恐其因此將計就計詐為殺首乞降之說暗藏叵測切不宜輕率出營受降萬一誤墮術中實屬不成事體將軍等當共知此意現在各路官軍俱令

逼近賊巢只須一處得進則他處自皆潰散若僅駐兵
看守不使賊人輒出而我兵亦無由得其尺寸之地
似此何時可以蒇事乎看來各路進攻官兵自當以
阿桂一路最為可望至昨諭令明亮統兵應往何路
協勦有益及令抽撥常青等各處兵丁如何妥善之
處亦惟阿桂實心籌酌著傳諭阿桂妥協辦理速行

奏聞

癸酉明亮舒常奏言正月十二日據駐守前敵之

阿爾都帶領金川頭人斯丹增漢兵十八名土兵
八名鳥鎗三十桿並帶賊番票帖前來據供各路
大兵攻打緊急我土司等畏懼令我求恩轉奏

大皇帝饒命並將兵丁鳥鎗獻出略表恭順畏罪之意
等語臣等諭以

大皇帝王法光明正大汝土司雖經知罪只送出幾個
兵丁尚不見得投順誠心一定還要殄滅如果實
心投順須汝土司一同到營方可奏求饒命曉諭

之後即將檄諭並送來兵丁鳥鎗令其帶回既杜
其欲圖徼倖之心更示以必行勦滅之勢賊畜共
知鬼蜮伎倆不能少施或計窮力竭賊首賊目親
詣軍營設計擒縛則兵力既省藏事尤速現在臣
等仍相機攻勦趕緊籌辦斷不肯為其所愚致稽
時日奏入

上諭內閣曰賊匪當此攻圍緊急之日指日即應殄滅
乃尚敢巧計嘗試殊堪切齒明亮等自應即將獻出

兵丁鳥鎗俱行存留並拘其頭人斯丹增嚴加刑訊究出實情方為正辦乃率行給與回檄並將斯丹增擅行縱歸所辦甚屬錯謬明亮舒常前此辦理軍務尚能實心妥協屢經獎諭優敘今辦理此事錯謬甚大不可輕恕俱著交部嚴加議處

甲戌阿桂豐昇額色布騰巴爾珠爾海蘭察額森特奏言賊首于康薩爾一處守禦不遺餘力臣等派侍衛佛倫泰等分路進攻均于十二日寅刻奮

迅直進刀斧手各兵先拽開攔道樹木並拔起鹿
角躍過重濠又往上拋擲火彈賊番儘力抵禦而
緊隨之鎗箭官兵先已舉鎗注矢以待凡有露身
滾放鎗石之賊立時擊射賊番傷死漸多正在逡
巡之際三面官兵一呼而上躍登碉頂將石板遮
蓋之地害同時踏塌其在碉內外之賊均已殺戮
而窖內及溝中之賊或被火彈燒斃或被所塌土
石壓死此碉共有賊番一百數十名負傷逃去者

甚少碉卡木城全行克獲察看害內西北有地穴一道穴頂用木板上托旁用大木揩柱頗為寬大步行無煩區僂係潛與第二碉卡相通之路現因第二碉卡賊番尚在固守遂用木植石塊將地穴填塞即于第一碉卡地方拿卡佔住至第二三賊碉其外皆護以木城而第二碉之外又築有石卡接應因令侍衛庫德爾進正面進攻烏什哈達等又從左手截其來援之路攻至已刻又將碉座木

城碉卡陸續攻克復進取第三大碉攻至戌刻一面直撲碉根拋入火彈一面復派官兵兩翼衝下賊恐圍住在內倉皇四出我兵追殺被殲之外餘多受傷竄走又將第三大碉及木城佔住看得第三碉卡其下尚有寨落賊番聚集踞守但相距稍遠且山脊兩旁皆係密箐若黑夜進攻難以接續隨令官兵于適中之地趕拿木柵且運礮轟摧至十三日黎明進攻賊番雖亦抵死相持而我兵勇

氣倍增四面環攻寨落三處大碉一座石卡七座
同時攻克併殺賊三十餘人至此下尚有寨落碉
卡復用礮擊打十四日黎明督兵進攻並派兵
截其後路我兵將抵碉前賊已驚慌敗遁康薩爾山
梁盡處皆係懸崖賊番無路可逃從懸崖跳下趺
斃者甚多其寨落三處大碉五座石卡八座又俱
佔據此三日內已將康薩爾山梁掃盡並將山溝
內水碉寨落一齊搶佔亦有殺戮至官兵內惟索

倫佐領兼輕車都尉巴西薩陣亡其二等侍衛庫爾德等九員雖受鎗石諸傷俱無妨礙所有陣亡及受傷官兵容俟查明另行咨部查滿漢屯土各兵本為奮勵此次更屬勇銳異常凡貿易之民人運糧之夫役無不噴噴稱羨臣等伏思此十二三日恭遇

皇上親詣齋宮

南郊告祭之時仰惟

至誠默禱上邀

靈佑是以士氣飛騰若有神功如此大寨堅碉得以迎刃而下查此處本係進取噶爾丹寺及噶朗噶勒烏圍正路而其前勒吉爾博山腿形勢延長賊番碉卡雖多未必能處處防守嚴密若稍遲日時賊首又必增修碉座攻取轉為費手臣等察看情形擬即在兩三日內迅速督攻以期搥入奏入

上諭軍機大臣曰邇日盼望軍報甚切而各路將軍連

次所奏俱未得手煩悶實甚覽此深為欣慰康薩爾
為賊首第一要隘今既將各處山梁盡行攻克是官
兵已得勝勢更可乘銳深入此實仰賴

上蒼嘉佑阿桂等尤當努力奮勉速成大功將軍等此次
調度有方幸獲大勝甚為可嘉俟攻得勒烏圍時再
行優敍所有陣亡之巴西薩甚為可惜著與受傷之
侍衛庫爾德等及陣亡弁兵一併查明咨部照例卹
賞其庫爾德等所受各傷俱曾全愈否亦著阿桂遇

便覆奏

同日阿桂豐昇額色布騰巴爾珠爾海蘭察額森
特奏言此次攻克康薩爾山梁官兵各加奮勉而
頭等侍衛雜爾丹巴魯圖佛倫太等十六員俱更為
超衆出力佛倫泰從前已得過雜爾丹巴圖魯名
號謹將現在出力各員聲明請

旨其吉林佐領委署參領奇蘭保黑龍江副總管委署
參領僧保防禦委署參領森保等三員已經賞戴

花翎吉林領催博布善黑龍江驍騎校委署參領
博濟爾圖阿密爾渾領催特蘇爾圖馬甲博索圖
西通阿巴津達爾貴州省守備明德何連陞千總
熊必勝湖南省千總項進材土練委署守備朗他
爾等十二人亦經賞戴藍翎可否酌量加

恩奏入

上諭曰佛倫泰著加恩賞給副都統職銜奇蘭保著賞
給札爵木巴圖魯名號僧保著賞給札舒木巴圖魯

名號森保著賞給袞爵木巴圖魯名號並照例每人各賞銀一百兩博布善等著加恩俱陞一等用

同日

上諭內閣曰此次攻克康薩爾山梁所有在事出力兵
丁守著賞給一月錢糧以示鼓勵

上又諭內閣曰署湖廣襄陽鎮總兵官達色自到川省
軍營奮勉出力著加恩實授襄陽鎮總兵以示獎勵

平定兩金川方畧卷一百十二

欽定四庫全書

平定兩金川方畧卷一百十五

史部

給事中臣查善長覆勘

總校官原任侍講臣王燕緒

欽定四庫全書

平定兩金川方略卷一百一

二月己卯阿桂豐昇額色布騰巴爾珠爾海蘭察
額森特奏高甲爾納西南有堪布卓寨若得其處
則甲爾納附近寨落截在官兵之後無難一律掃
除因議派健銳火器兩營滿兵分為兩翼潛進合
圍並令正路攻碉之兵擡梯前往為奮迅登碉之
用十六日子刻進發左右兩翼滿兵潛密無聲分

頭抄進比及合圍當即以拋擲火彈為號正路官兵一齊下壓賊番雖已知覺鎗石如雨而我兵從鎗石叢中堅梯而上據碉房之頂賊番竄走無路均為刀箭所斃其伏匿寨中者又為火彈燒死及官兵踹塌碉房所壓約計五十餘人無一得脫者當從我兵前卡直至堪布卓拏柵防守至十七日丑刻復整兵進攻甲爾納寨該處賊番已被官兵截斷正用皮船偷渡官兵追擊均經落水淹斃又

將甲爾納寨及寨後堅碉一併攻克其沿河崖洞
內賊番亦俱搜出誅死共計殺賊百餘名我官兵
內惟副將烏爾納委署叅領七十五為鎗石所傷
均無妨礙其遜克爾宗之兵臣等於是日令普爾
普等設法進剿勒吉爾博賊寨亦於十七日子刻
冒雪潛進攻擊所殪之賊更復不少而索倫佐領
伊爾賽因直前攻撲以致傷亡委署叅領德海都
司梁朝柱亦因奮勇先登均得鎗傷

阿桂豐昇額色布騰巴爾珠爾又奏言臣等于二月十六日夜有番人朗木太從金川投出臣等嚴加詰訊據供稱賊人砍於康薩爾日爾巴當噶甲爾納等處偷截後路以伊本係鄂克什人官兵必不動疑探知官兵多少以便下手又供要截官兵後路之語是土司分付當噶拉阿納木令其出來散播使官兵專顧後路則前面攻打之處或可稍疎查大兵進討本為金川賊首黨助小金川攻圍鄂克

什而發今該番以鄂克什人乃轉甘為賊酋使用
偵探大兵信息種種狡謫實堪痛恨除飛札富勒
渾常青旺保祿等嚴密防範外將朗木太即行正
法

同日阿桂又奏言查宜喜山梁與西路大營相對
臣每日詳加審度形勢若添兵力越溝截出其後
斷無不能摧破臣思南路官兵共有一萬三千四百
今以卡卡角馬尼兩寨之故而使如許兵力株守

是我欲牽綏賊番轉為賊番所綏寔屬非計且宜
喜日旁又以兵力既分不能籌辦是此兩路三萬
餘兵均為無用之兵尤為可惜臣再四圖維南路
官兵若為進取之計則此現有之數原不為多若
僅為牽綏之計則雖抽出一半亦不為少即如凱
立葉一路自豐昇額來西路之後僅存兵四千餘
名宜喜自明亮移駐日旁後僅存兵三四千名而
五岱馬彪在彼統領並無疎失况南路河北之馬

尼河南之深嘉卜本屬巴旺布拉克底舊地今不
過添助官兵足資備禦是以前年河北之臨卡等
處臣僅派兵數百名往駐從未見有賊番滋擾而
章谷一處本在明正土司境內更無籍於多兵至
前此劉秉恬奏稱霍爾章谷土司之女已為賊首
土婦輒慮賊酋將來力極勢窮從此竄走但以臣
愚見度之現據朗木太供稱莎羅奔兄弟斷不敢
逃往各土司地方官兵圍住噶拉依時即為焚斃

之計臣正恐賊酋情急自戕不能生致若從此喙走則革布什咱本與金川深讐霍爾章谷土司亦深知畏法現遣其頭目來營稟訴並不敢視為親戚則逃往轉無難於弋獲臣於此實可以深信統計富德處一萬三千餘兵內實可抽出六千名其餘剩七千餘名分撥於緊要卡隘已無不足其章谷吉地一帶若抽出兵丁一千名於駐防之制亦尚充裕統計抽出官兵七千人合以宜喜日旁原

有之兵已得戰兵萬餘宜喜山梁自無難於摧破
而宜喜之兵下至河沿則日旁一帶之賊截斷在
內而臣一路亦可直破勒烏圍勒烏圍破而噶拉
依亦不能守即或賊番尚思退守噶拉依則此項
兵丁循河南南再攻正地一得正地再合攻庚額
特仍可以為南路之用而臣一路官兵直搗噶拉
依更可收夾攻之效似成功較為迅速均奏入
上諭軍機大臣曰阿桂等奏攻克甲爾納堪布卓沿河

各碉寨情形甚屬奮勉可嘉據稱豎梯而上想係所
帶雲梯即此可見平時演習之效其先登者為誰著
即查明據實具奏以便加恩示獎此兩處攻得已至
河沿一帶官兵汲飲有資即可乘勝直取得式梯進
剿勒烏圍其勒吉爾博山梁碉卡若能相機攻得於
進取更為有益至已攻得甲爾納對河即係斯年木
咱爾與明亮軍營更近阿桂等固可隔河用砲轟摧
明亮等亦可約會就近設法夾攻若能併力攻得斯

年木咱爾於進攻勒烏圍尤為得力至所稱攻碉時
索倫佐領伊爾賽因攻撲傷亡甚為可惜其都司梁
朝桂等先登受傷亦屬可憫並交阿桂等將陣亡受
傷弁兵一併查明咨部議卹至盤獲奸細朗木太必
係阿桂窺破其狡譎情形逐一嚴訊方能得實他人
並不能如此用心阿桂既辦及此則各處投出之人
將軍叅贊等不可不留心體察如有形迹可疑者即
當嚴詰得實勿為賊番所愚至阿桂另摺所奏議調

南路等處兵七千名會攻宜喜山梁所見甚是與朕
前此所降諭旨適合絨布一帶現雖駐兵牽綴賊勢
但明亮西路之兵若能攻進即可由馬爾邦一路夾
攻取勝引進南路之兵同勦噶拉依惟其地甚關緊
要亦須勇幹大員統兵駐守富德自不便輕離該處
著傳諭富德即速酌量抽撥

同日富勒渾奏言竊將軍阿桂等已將前敵康薩
爾山梁攻得現在乘勝攻取迤南勒吉爾博若經

攻克便可直取噶爾丹喇嘛寺進搗賊巢所有軍糧軍火銅劙礮料等項儲備充餘足敷支應其兩處前敵所需礮子亦飛飭各站將生鐵儘數運供以資利用再大兵既克康薩爾一帶即日下抵河干會合北路官兵必須用船濟渡一切船料久已備辦齊全並製造皮船聽候調用均可無悞至後路谷噶薩爾赤一帶以近接大營經將軍阿桂派撥官兵逐節防守其梭洛柏古等處前經臣委員

帶兵防駐用壯聲援近復咨明提臣常青旺保祿等以大兵攻抵勒烏圍賊番勢必瓦解奔逃務須督率將備嚴加堵截以淨餘孽

同日劉秉恬奏言臣見將軍阿桂十五日所遞奏摺傳牌內填寫自康薩爾拜發知大兵又已前進攻獲自必添站需夫臣查前此預備夫二千名現在分安各處聽候調撥一俟軍營調用臣即親身帶往安設以應急需均奏入

上嘉之

壬午富德奏言正月十四日夜有賊番五六十人從沙錫理山梁下至河北路旁藏匿探哨侍衛星山保等帶兵攻勦殲斃數人賊即竄逃奏入上諭軍機大臣曰今日富德摺到不過將所放夾壩之賊殲戮數人據此看來富德所領之兵斷不能前進與其將一萬數千人為牽綴賊番之用何若分助明亮之為得濟乎富德若以兵少不敷派撥致有遺悞

則獲罪重大矣著傳諭富德速派兵六千名前往明
亮軍營仍帶餘兵用心駐守如遇窺探賊番盡行勦
殺倘有疎虞或令賊番少得便宜亦惟伊是問

甲申明亮舒常奏言臣等接閱阿桂摺稿議調南
路官兵會攻宜喜誠為善策如此辦理自與全局
有益可以早期歲事臣明亮於上年六月間由綽
斯甲布攻克達爾圖日旁要隘添築碉卡酌留三
千餘名駐守餘兵帶至日旁共有四千餘名每次

打仗儘力抽撥得兵將及二千實屬不敷今阿桂
通盤籌畫實合目下機宜况當西路攻勦正急賊
番慌亂無措之際添兵併攻可期必克再南路官
兵由馬奈而至宜喜計程十二日臣等於未到之
前先於喀爾西等處隨時攻勦以分賊勢其宜喜
達爾圖暫置不辦猝然攻取更易得手奏入

上諭軍機大臣曰明亮等奏稱由南路至宜喜計十二
日行程所調之兵自不能甚速著再傳諭富德令其

即速抽撥遄赴宜喜備用勿稍遲悞致干重戾

丙戌阿桂豐昇額色布騰巴爾珠爾海蘭察額森
特奏言查堪布卓西南小山腿尚有碉寨一所地
名斯莫思達攻克此處則官兵前進始無妨碍臣
等先已圍其三面並將礮位轟摧正月二十四日
派副都統額爾特等分為兩翼進攻又派侍衛彰
靄帶兵抄越賊畠恐被圍截且戰且走官兵合力
搶殺殲賊十數名其餘竄至河邊被追緊迫溺斃

頗多當將沿河斯莫思達大碉一座木城一座石
卡二座均行佔住

同日富德奏言阿桂奏請抽撤南路官兵迅搗賊
巢雖屬妥善但查南路自臨卡至深嘉卜河南一
帶固屬布拉克底地界而河北自馬尼絨布木谿
以至前敵德木特布克咱納一帶俱係陸續攻克
之地且由拉綽馬尼絨布以及墨格爾德宗木
谿庚札木古卡卡角沙錫理羊圈穆當噶爾德木

特布克咱納至深嘉卜山梁地面綿長不下二百
餘里且重山疊嶂深溝險澗更兼箐林叢雜雪霧
迷漫無處不與賊徑相通晝夜防範猶恐或疎而
臣一路之滿漢屯土各兵通盤計算雖有一萬二
千餘名除派守各處山梁卡隘橋座臺站留防臨
卡駱駝溝之外並有撥護軍糧火藥者以及節次
病故受傷所有大小十座營盤內每營或二三百
名或一百數十名可戰之兵不過一千五百名此

內又復視其緊要處分派侍衛官員帶領設伏以防侵擾并乘間殲戮賊人攻奪碉卡力圖進取原不僅為章綴賊番之計查南路後路自科多僧格爾宗納木覺爾宗以及章谷一帶相隔二百餘里章谷自格藏橋至吉地丹東等處亦有二百餘里由章谷至絨布大營又有一百數十里惟恃絨布一路各營大兵彈壓接續目下若於此內抽撤以足六千之數未免兵力單微是以臣齊集各領隊

大臣公同商酌在各營卡及章谷後路僅可抽撥
兵三千餘名庶可進剿宜喜及留防此處兩有裨
益再臣一路之領隊大臣等不過帶兵打仗其能
調度措置熟悉機宜者實不得其人伏懇

皇上在於西北兩路領隊大臣內揀選一員調赴南路
絨布一帶統領防守臣富德帶兵前赴宜喜竭力
籌辦均奏入

上諭軍機大臣曰阿桂等奏攻克沿河斯莫思達碉寨

乘勝深入自屬更便阿桂等尤當設法妥速辦理佇
聽捷音又富德奏南路現在情形防範亦屬緊要自
不便過於多撤或致兵力太單且所請抽撥三千兼
之章谷抽派一千合以宜喜日旁原有之兵可得七
千餘人足敷進剿之用即著照富德所請准其撥兵
三千前往宜喜協勦至絨布一帶甚關緊要富德未
可輕離即興兆舒亮均係南路得力之員該處將領
無多亦不宜再行分派著富德仍在絨布寨駐守其

派往宜喜之兵只須選派章京等率領並著明亮于
奎林和隆武三寶內酌留一員同舒常駐扎帶石以
綏賊勢仍於此內酌派二員星馳前往南路一帶迎
見抽撥之三千兵帶領遄行明亮亦即選戰兵數千
迅赴宜喜部署一切俟南路之兵一到相機設法進
攻以期必得

同日阿桂豐昇額色布騰巴爾珠爾富勒渾奏言
臣富勒渾據革職効力叨烏站員王石渠報兵役

趙得富李友等拏獲保縣逆犯張坤忠之姪張元
由梭洛栢古解來臣阿桂等嚴加訊辦據供伊本
姓姜係卽州大邑縣人跟隨伊母楊氏轉嫁保縣
人張登魁遂為其子張登魁弟張坤忠係維州兵
丁三十八年在達扎克角出兵在軍營偷竊火藥
逃入金川該犯父子亦即同逃賊酋均配與女人
又令張登魁鑄礮張元挖礮製造火藥上年張坤
忠曾叫張元於叨烏瑪爾當兩次偷過牛隻餅麵

等物此次實因賊番口糧窘迫計及時當年節糧
站防範必疎欲於叨烏站上来放夾壩先令該犯
潛來探路旋被盤獲等語查張坤忠以內地兵丁
逃往賊境實屬罪大惡極而張元父子又同逃往
且為賊番鑄礮挖礮屢放夾壩非尋常悖逆可比
已于正月二十七日將張元寸磔處死仍函首發
往保縣示衆奏入

上諭內閣曰阿桂等奏拏獲逆犯張元即行磔死梟示

所辦甚是至站員王石渠督飭兵役細心盤獲洵為奮勉出力且伊係革職効力之微員能如此查拏要犯更屬可嘉王石渠著加恩以縣丞即用其兵役李友趙得富等即飭該站員查明重賞至叨烏一站係富勒渾管轄之地逆犯張元即於彼處拏獲富勒渾著免其交部其餘應行議處各職名仍著該督等查明送部分別議處

同日郝碩奏言查軍糧最關緊要目下米價較上

年已覺稍長此後恐日漸加增臣思三路軍營所設各站人夫共有七萬餘名每日即需米七百餘石而近軍營口外各地方俱種植春麥若於收割時各路採辦灰麵數十萬觔將該站夫應支口糧五日之內搭放一日灰麵該夫等亦所樂從而一日之內即可節省數十石於軍糧人夫均有裨益

應請

旨勅下署川督臣文綬轉飭辦理奏入

上諭軍機大臣曰著傳諭文綬即飭附近各路軍營州
縣於春麥收割時採買灰麵數十萬觔分給各站搭
放人夫口糧如有餘剩仍送軍營備用

丁亥

上諭軍機大臣曰現在征勦金川大功已屬垂成自可
剋期歲事惟賊番護巢衛死守拒並嚴即得勒烏圍
後尚恐其堅守噶拉依不免稍需時日昨據文綬奏
去冬所撥京餉於正月二十日起已解到一百五十

萬兩其餘亦可源源續至前據伊等籌算此項餉銀
可用至本年四月今又撥京餉五百萬約計可用至
九月似不須復籌接濟但軍需用度寧可寬餘儲備
著傳諭富勒渾文綬悉心核計前後所撥京餉約可
用至何時即行據寔奏聞當再撥餉五百萬解往以
期寬裕

壬辰富德奏言現在賊人于各隘口添造碉卡晝
夜防守鎗石如雨惟此時河溝水涸露灘尚有抄

遼之隙若乘賊衆造卡刨溝未成之際攻取喀咱
普得婁地方最為便益隨於正月二十九日子刻
派令興兆舒亮帶兵進攻賊番知覺抵禦而我兵
奮勇衝突鎗箭交攻賊番敗走趕殺無算奪獲卡
子五座即起木城看守

同日明亮舒常奏言查喀爾西一帶山險林密應
用上兵土司雍中旺爾結情願來營督勦臣等遂
於正月二十八日子刻派兵前進先將喀爾西之

下小徑拏石卡四處堵截又於過渡處搭橋兩頭
拏卡看守維時斯聶斯布羅沙壩山等處賊番前
來為上下夾攻之計經奎林和隆武等督催官兵
分頭接應擊斃賊番甚多所拏木城七座業已完
竣均奏入

上諭軍機大臣曰富德奏派兵攻打喀咱普得婁情形
所辦亦好自當因此乘勝相機進取以期深入閼富
德前次所奏地圖其現攻之喀咱普及由德木特進

攻之得婁均距馬爾邦不遠若能攻得則馬爾邦一
帶似有可進之機或可乘勝直進則非多兵不可若
撥去三千恐不敷用此又今昔情形不同非可執一
而論者軍營之事原屬移步換形朕於此從無成見
若富德能留此兵攻進馬爾邦與明亮添兵由達爾
圖攻進何異又何必往來僕僕乎著富德自行酌量
若將應行抽撥之三千兵留住可以攻進馬爾邦即
毋庸復為撥往惟期於事有益當善體朕意妥酌行

之據實覆奏又富德奏內有賊番鎗石如雨之語未免可疑凡自賊中投出番衆及拏獲生口俱供賊番火藥日漸缺少似非虛妄焉得尚有寬餘之藥放鎗不絕乎其中恐稍有粉飾未足盡信著傳諭各路將軍叅贊嗣後奏報賊情賊數止應據實核奏不得稍有絲毫捏飾又據明亮等奏進攻喀爾西情形既拏得七座木城即有可憑之勢且又有三將軍駁位轟擊賊碉更可望摧堅克捷明亮等當努力為之

癸巳阿桂豐昇額色布騰巴爾珠爾海蘭察額森
特奏言查沿河尚有碉寨六處與得式梯官寨相
隔格魯克古溪河一道必須先為攻取其六處內
惟擦庸及羣尼兩碉最為高大羣尼碉礮下又有
寨落一座均為從斯莫恩達前進所必經兩日以
來碉寨為大礮所轟擊間有坍損自應亟圖攻克其
遜克爾宗亦應同時攻打使賊番左支右訛當於
二月初三日臣色布騰巴爾珠爾臣額森特派令

侍衛巴三泰攻取羣尼各碉寨詎賊番偵候甚嚴
覺有官兵來撲旋即放鎗滾石而遊擊靈山等督
兵直抵寨下砍門躍牆鎗箭齊施刀矛短接殺傷
甚衆其驚惶竄出之賊又被官兵緊趕殲戮頗多
當將寨落奪獲至臣豐昇額先於康薩爾大營挑
帶精銳三百名前抵遜克爾宗相對營盤派令成
德等分為三隊進攻初四日已刻一擁直前壕內
碉內之賊死力迎拒官兵相持良久西北一帶之

賊分頭來援雖有殺傷久攻無益因將官兵酌撤
此次打仗副將佛遜中礮陣亡巴圖魯章京興奎
藍領侍衛訥松額委署參領達什總兵索明遊擊
唐達先受傷均無妨碍

同日阿桂奏言臣查各路官兵幾同株守自不得
不加增兵力竊思各省綠營節次調撥為數已多
但赴營日久其中陣亡病故以及傷病遣回並未
出在逃者亦復不少即如西路內所調四起貴州

兵丁共有九千今留防後路之黔兵祇存三千三
四百較之原來之數幾去三分之二以貴州一省
例之則他省官兵亦必如此而以西路一路例之
則各路官兵短少之處亦必相同是以計原調之
數實覺其多而核計現在之數則已懸殊查此種
兵丁內除在逃未出以及傷病遣回懸缺未補外
其陣亡病故所遺之缺凡本無餘丁及餘丁補完
者皆咨回本省募補即傷病遣回之兵其身故者

既在本省補缺即傷病痊愈者亦仍在本省當差
約計各省此次兵丁共有一萬數千名今除四川
一省已商同富勒渾等於中挑選三千名料理來
營其隣近之陝甘貴州三省亦可共挑出六千名
令赴川省軍營綠營官兵在途行走除例給人夫
擡送軍裝外其餘並無繁費及抵軍營統計添兵
一萬每月所需口糧鹽菜不過五六萬兩而合計
現在每月各路兵夫所需不下百萬如添此兵力

早完一兩月之局則於帑項軍需較可多為節省
況此附近四川省程途俱近迅速遄行不過四
月內均可到營屆時大功告成則此地平定之後
原須留兵駐守即可將出兵日久之兵撤回本省
而令新到之兵分撥防守若屆時尚有未盡掃除
之處則視何路兵數不敷即行增添或另為一路
攻勦於迅速成功之局更有把握

同日阿桂豐昇額色布騰巴爾珠爾奏言查畝地

重山複嶺在在皆然以大勢而論則自日爾巴當噶
陸烏當噶以至沿河已屬自高而下其實支脈縱橫一大山之左右輒有山腿數道而一山腿左右又各有小山腿數道賊番總在峯巒突起之處築碉守卡竭力拒守官兵前往攻打仍須自上而下又自下仰攻即現在沿河地方地勢較平而自堪布卓而南如得式梯寨噶爾丹寺皆在高阜之上且番人因山為田田礎之高下輒有數尺及數

丈不等兵丁攀躋跳越並非從高下壓其勢一順者可比是以臣等遇有可以繞越之處即行發兵繞進者職此之故今揆度賊情實為窘迫如另從當噶功噶分兵進攻誠如

聖諭實屬出奇之一法但此就當噶功噶木果木三路內以臣等愚見揆之當噶爾拉山勢逶迤自納木覺爾宗上山計至山嶺約有八九十里賊在小山高巔一經望見即能預備且岡嶺延長斷非少兵所能

估據其木果木一帶山勢雖高而自崇德牛廠而進道路稍為徑直若能乘虛而進賊必慌亂將來添兵分進似應於功噶爾拉一路為宜臣等再四籌畫從前四川各鎮協兵丁調在各路者幾及二萬所遺糧缺移回內地募補者約有數千昨富勒渾來營臣等商定令其會同文綬查明實數將遺缺新募之兵留於本地以供差使即於舊存兵丁及傷病已愈者挑其人材壯健技藝嫻熟三十人前來

以備另路之用至後路各兵較之現在大營打仗
之兵不無稍遜然究係屢經行陣之人自可抽調
添用臣將現將後路可以裁減之處通盤籌畫并
俟富勒渾文綬查明可得兵數若干料理起程屆
時官兵攻進愈深賊番力量愈薄臣等即將分路
事宜一面辦理一面奏

聞

阿桂豐昇額色布騰巴爾珠爾又奏言查明亮處

官兵因帶石一條山脊形勢險窄賊番設卡創溝
據守難於直入且兵力既分一時無從措手查宜
喜山梁形勢正值西路大營對面臣等詳加審察
若添兵數千不必攻撲大碉竟從山溝繞越直截
賊後斷無不破之理而攻破之後順山腿而下賊
更不能堵禦更可直至勒烏圍對河目今可以速
行歲事之局無過於此今准富德抄送摺稿內稱
南路各營卡及章谷後路止可抽兵三千之語去

冬臣阿桂查據南路按察使李世傑報稱南路河
南北共有滿漢屯土官兵一萬三千八百餘名何
以現在可抽兵數僅止於此况臣等揆度南路打
仗情形若西路之兵一至噶拉依則南路一隅之
賊必成瓦解此時南路僅為駐守之計原無須於
多兵今准明亮等覆札稱辦理此事非八九千兵
不可而革布什咱土兵惟願在本地攻打既不能
調出其宜喜日旁兩處俱只可抽派千餘合以南

路調來之三千兵即能攻得碉卡未必能直至河邊等語是宜善一路又難遽行辦理均奏入

上諭軍機大臣曰阿桂籌奏攻打沿河寨落及勒吉爾博遜克爾宗情形頗屬認真但俱未能得利甚為焦急所有兩處攻打陣亡受傷官員兵丁並著查明照例咨部恤賞至另摺所稱各省綠營應行補缺兵額共萬餘名請川省調撥三千並於陝甘貴州挑補六千赴川備用等語已飛諭各該督撫迅速挑辦派員

帶領遄程前往現在征勦金川一切調度惟阿桂是
恃是以有所陳懇悉如所請允行今既准添此項兵
丁則官兵聲勢倍盛凡在營士卒應益知鼓舞奮興
而土兵見添兵攻勦尤為減金川之驗更可堅其効
順之忱即賊衆聞之自必更加驚恐潰散尤速今大
功已屆垂成凡有益於進攻之事朕不肯稍為憚煩
惜費阿桂不可坐待此兵務宜速籌勝算迅奏膚功
以紓朕宵旰懸念至三路攻勦之兵惟阿桂一路屢

經攻奪險要逼近賊巢其明亮舒常一路自攻克達爾圖山梁後總未能籌勦得利及駐兵帶石以來又將數月此路既不可進自應繞往達爾圖一路或宜喜一路另籌進攻似此遷延株守何時可望成功而富德一路擁兵不為不多乃自上年四五月後半載有餘不過攻得尋常碉卡數座其於河之南北如庚額特等處緊要地方均未能摧破若俱如此攻勦則賊境何由得進且同係賊番碉卡何以阿桂統兵所

至不論仰攻旁擊到處摧堅明亮舒常富德均著傳
旨申飭阿桂前奏明亮一路約計需兵七千著富德
處撥兵三千前往其吉地章谷亦可撥兵一千又阿
桂商令富勒渾等酌撥川省兵三千亦可令先赴明
亮處應用明亮得此七千兵合伊所統兵內再挑數
千即可滿萬豈有如此力量尚不能進攻之理明亮
即當仍遵前旨令舒常駐守帶石自行馳赴宜喜迅
速進攻仍各將籌辦得勝情形迅速覆奏佇盼捷音

上又諭軍機大臣曰川省各路大兵現在乘勝深入所
有攻得碉卡要隘均須節節留兵防守若再加添兵
力一鼓直前賊衆聞之自必更加慌亂嚴事尤為迅
速據阿桂奏稱酌調甘陝川黔各省兵丁著即傳諭
富勒渾文綬迅速妥辦一面遣赴軍營一面奏聞并
著勒爾謹畢沅韋謙恒會同各該提督於甘肅陝西
貴州各省各挑精兵二千名選派勇往曉事之鎮將
備弁星速帶領前往川省軍營應用如提督相隔稍

遠者該督撫徑行選派再行知會勿因會辦致羈時日其一切軍裝器械料理起程并沿途行走各事宜著該督等查照前例迅速妥辦其何省兵丁應派何路軍營並著阿桂先期檄知帶兵人員分路馳往並著富勒渾文綬速飭所屬於陝甘黔三省赴川路徑沿途妥為經理俾各兵隨到隨行勿稍阻滯

臣等謹案官兵分路進剿直逼賊巢大功已計日可就而摧碉掃穴繞道進攻以及分防要隘

必須兵力加增斯軍威益盛

皇上因臣阿桂奏懇

洞矚軍情即再調川兵三千陝甘黔兵各二千遄赴軍營聲勢倍壯不特隨征士卒踴躍奮興而土兵之効順彌堅賊衆之驚潰益速此皆仰賴

天威震懾諸臣得稟承調度藉以所向克捷露布迅馳也

平定兩金川方畧卷一百十三

欽定四庫全書

平定兩金川方畧卷一百十四

二月甲午

上諭軍機大臣曰昨據阿桂奏請調撥陝甘貴州兵丁六千名赴川備用已照所請諭令各督撫即速照數撥遣矣今恩此項添調之兵未必果有實濟即如陝甘二省昨歲曾據勒爾謹奏稱此後難以再敷調遣今阿桂雖稱各省在營兵丁均有缺額已行知該本

省募補并有各營受傷兵丁仍撥回本營養傷者在
阿桂之意似以現在擬調之兵仍係軍營原缺之額
非另添新兵可比但各營缺額雖經咨回本處其曾
否募補足數及新募之兵果否得力或仍以舊兵撥
川募兵留營抵數及發回養傷之兵曾否痊愈可用
均須妥為籌辦該督撫若欲核實籌撥恐難於額數
適敷若隨意挑補充數發往仍屬有名無實此事昨
經阿桂奏到朕以其身任征勦專責所籌自應不悞

隨即兌行竟夕躊躇通盤詳計實有未能悉妥協者
除四川本省所調三千尚可及時應用其餘傳諭陝
甘貴州督撫令其實心籌酌將能否照辦之處一面
辦理一面奏聞是此項兵丁果能赴川與否尚難遽
定即各該省竟如數調發而核計行程亦復五月初
間方抵軍營阿桂現統大兵直入距勒烏圍賊巢不
遠搗穴擒渠計日而辦豈可尚存遷延之見待至五
月新兵到後始期成事乎即以善後駐兵而論各省

綠營兵調集川省者已不為少以備挑選駐守兵數
儘自有餘何必更藉此三省新兵湊補即三省之兵
業已調發阿桂亦當酌量其入川後如已屬功成即
速檄令領兵之員仍行帶回勿致徒勞往返細閱阿
桂昨奏調兵之意以明亮一路宜喜山梁正值西路
大營對面若添兵數千不必攻撲大碉竟從山溝繞
越直截賊後斷無不破之理明亮一路果須添兵連
進亦不宜俟遠省調兵再辦昨已諭令富德酌量撥

兵又於吉地章谷抽撥合計可得兵七千若如阿桂所言宜喜一路得此多兵自可迅速直進如明亮一路雖係添兵仍不能進步即留舒常在帶石並於奎林和隆武三寶三人內酌派一人同其領兵駐守明亮等即帶所添之兵歸併阿桂軍營合力籌勦以期迅速集事較之調兵遠省多延時日者自更直捷阿桂何不計及此乎著傳諭阿桂等迅速妥籌辦理毋為緩不濟急之見又昨據阿桂奏准明亮札稱革布

什咱土兵惟願在木池攻打等語殊屬非是現在各路軍營隨征土兵自各處調集者多若如革布什咱土兵之言則各土兵皆憚於遠離何由得隨營効用之力況土兵等既隨征到營自應聽將軍調度何得任其自逞已私此等兵丁自當查明予以懲治即不然亦當立時嚴飭使知儆畏明亮何竟視為當然之事轉向阿桂代述其言即此可見明亮之不善辦事著傳諭明亮此時且不必提起但查明此等兵丁記

檔俟功成應予議敘時將功抵折并飭諭衆土兵嗣後不許再存此見致干咎戾

戊戌明亮舒常奏言查喀爾西科拉木達兩處碉寨從前因隔大溝轟擊未能得力茲於緊要處所建立木城即將礮運至其處晝夜擊打日見損塌但該處樹林稠密賊番晝則避於林內或藏匿地窖夜則潛出趕緊黏補且科拉木達上有戰碉以衛寨落若將此碉擊塌賊番無所倚恃方易於搶

佔惟我兵駐守木城之處乏水濟用臣等差人尋
覓帶石右坡之上有水泉一處於初二日派兵拏
卡已將水泉佔據目今取水已為便捷賊番是夜
來奪兩次皆被官兵擊敗再土司雍中旺爾結於
正月二十七日來營二十八日進勦喀爾西等處
督催土兵倍常出力究因救援賊多未能克獲該
土司稟請回寨添派土兵臣等酌加獎賞令其回
寨奏入

上諭軍機大臣曰明亮等奏添建木城奪獲水泉雖亦
設法進攻總未能得其要領如所稱用礮擊打賊碉
自應晝夜不輟使賊番無暇修補若賊果夜間潛出
尤當乘其外出用鎗礮極力轟擊既可毀其碉卡兼
可殲斃賊番方為正理乃聽其潛出補碉毫無措置
明亮等太覺無用如此安能望其有成至土司雍中
旺爾結告稱回寨添派土兵固屬誠心出力亦未免
借派兵為名暫欲回寨明亮等准令回寨催兵所辦

亦是但俟到營後即須善為駕馭令其上緊効力勿使觀望遲延為要

己亥阿桂豐昇額色布騰巴爾珠爾海蘭察額森特奏言查勒吉爾博山梁中間向北有小山腿兩道冰雪已消若從此進攻得手向西即可出得式梯之後與桑噶斯瑪特官兵兩面夾攻惟勒吉爾博山梁至第一道山腿其上木城卡共有三十餘座因分派海祿佛倫泰岱森保福康安保寧特成

額等分路進攻又令各官兵攜帶鋤鏟以便刨挖
碉根又備梯子以供爬越上碉之用二月初七日
丑刻各帶官兵前進拔開鹿角躍進壕溝均將火
彈拋上碉頂並欲布梯而登其直抵碉根之下者
已用鋤鏟刨成孔穴即從孔穴之內擲入火彈賊
番見勢危急將碉牆堆積石塊推滾而下木梯既
難安立而孔穴內所擲火彈僅能入碉下層賊番
均在上層竭力抵禦藥力雖亦上達攻至辰刻未

能攻克因將官兵酌撤賊番間有出碉思圖冲壓者多被官兵傷斃遁走是日臣色布騰巴爾珠爾額森特進攻羣尼擦庸各碉寨亦因碉寨內賊番鎗石甚緊而碉旁山腿及河岸之賊合放鎗礮擊打久站無益因亦撤回另辦先是初四日寅刻賊番來擾護軍校德克精額營卡經德克精額率兵擊殺受創竄逃又初七日子刻賊劫湖廣都司馬定鼎之卡馬定鼎帶領卡兵三十餘名奮力迎敵

將賊番擊退而喇穆喇穆遊擊明安圖營卡又有
賊二百餘人分路攻圍明安圖率兵廬戰殲戮甚
多賊不能支始行敗遁同時副將豐盛阿營盤亦
有賊百餘人直來圍撲該副將竭力迎擊賊番敗
而復進連衝數次均被官兵殺退其遊擊巴達瑪
圖所駐之卡是時亦有賊番滋擾官兵迎擊擒獲
生口一名並奪獲器械等物比至天明察看各營
卡外石邊草上鮮血淋漓併各處拖屍痕跡甚多

計殲賊番不少

同日富德奏言二月初五日臣令舒亮等攻取河南喀咱普碉卡官兵奮勇爭先衝至賊番所挖三層溝嶮殺傷多賊其餘逃匿第二層溝中攻至已刻兩面山峯救援賊番甚衆徐徐酌撤均奏入

上諭軍機大臣曰阿桂等奏分攻勒吉爾博等處碉寨並痛殲喇穆喇穆偷刮營卡賊番情形將領官兵等可謂實力奮勉再能如此認真攻勦數次賊番殲戮

愈多賊衆必惶懼難支敗亡尤速閱所擒活口供詞
賊中火藥無多糧食亦乏並選婦人穿男衣假充兵
數其窘迫可知即所云對衆人言圖劫官兵後路營
盤搶些口糧火藥之語亦非捏飾并述其土司言官
兵一到勒烏圍我們只好走到噶拉衣官寨自己放
火燒死這官寨就是我們坟墓等語固屬激勵番衆
之詞而其窮蹙恐怖之情亦可概見賊番狡詭惟以
遮截後路為長技今護軍校德克精額都司馬定鼎

遊擊明安圖副將豐盛阿遊擊巴達瑪圖等各營卡
均有賊衆潛來滋擾經官兵盡力勦殺不但不能得
手且大吃虧其伎倆已無可施愈覺勢窮計竭攻取
尤為易易更宜及早圖之此五人均應獎賞至聞逆
酋索諾木湊集番衆親帶至拉枯喇嘛寺等處以希
圖僥倖於萬一固屬可恨但索諾木此時同其助惡
頭人丹巴沃咱爾等前至勒烏圍一路即充其力量
亦何能為自係逆酋等罪惡貫盈

上天隱奪其魄驅攝聚於一處以供官兵擒縛其來實係
極好機會阿桂等即當設法掩捕將逆酋及其兄弟
頭人一併俘獲則成事尤為迅速全完就各路情形
而論惟阿桂一路專為可恃朕亦惟於阿桂是賴阿
桂務當努力籌辦速成大功以膺懋賞

同日據富德奏到之摺不過敷衍塞責斷不能復有
寸進徒擁一萬三千餘兵在彼實屬無益竟當照阿
桂原奏令其即於一萬三千兵內抽撥健兵六千速

派領隊人員帶往明亮軍營應用明亮俟兵一到即
將帶石一路交舒常駐守並於奎林和隆武三寶內
酌派一人同其統兵防守以緩賊勢明亮統領南路
撥到之六千兵并於帶石現有兵內酌選數千帶同
遄赴宜喜一路速圖進取自可望其得力若慮官兵
撥去六千南路未免空虛賊酋窘迫之時或從此軼
出果爾亦不過逃往革布什咱及綽斯甲布等處現
在綽斯甲布土司雍中旺爾結等隨營効順方冀成

功受賞設索諾木等果竄其境自必立時擒獻斷不敢藏匿逆酋自干重庆至革布什咱土司經金川殘害之餘勢已孱弱即或逆酋遁至彼處該土司亦必不敢容留萬一逆酋等强行佔據其地無險可憑官兵合力追擒無難立時縛繫此等情節俱無可虞仍著傳諭阿桂即速悉心熟籌一面札催富德辦理一面奏聞

臣等謹案逆酋罪惡貫盈人心共憤當此食窮

力竭已屬金底游魂乃索諾木復同其助惡頭人湊集番衆前至勒烏圍一路希圖僥倖萬一我

皇上明切曉諭以為

上天隱奪其魄驅攝聚於一處以供官兵擒縛厥後勒烏圍既破大兵采入逆酋及番衆果同時就俘益

仰見

睿慮周知無一事不先幾炳燭云

同日

上又諭軍機大臣曰富德自到絨布以來為日已久乃每次奏稱殺賊而仍然株守其所奏痛殲賊衆特不過虛張粉飾之詞敷衍塞責於軍事全然無益而阿桂調兵又不肯如數發往是誠何心富德乃獲重罪之人朕曲加寬宥復畀以叅贊大臣重任伊自當感激朕恩協力同心不存私意以冀成功乃只為一身之計殊屬不堪富德著傳旨嚴行申飭

庚子

上諭軍機大臣曰南路調兵一事昨已詳晰飭諭富德並令阿桂一面妥酌辦理一面奏聞矣阿桂請調南路兵六千之摺於二月初一日奏到隨即傳諭富德遵辦乃於二月十四日據富德奏南路只能抽兵三千名若令其自行帶往止須兵二千已隱然有不願抽撥之意同日復據奏攻碉殺賊情形尚冀其或可由馬爾邦采入若竟能得手原不必拘定何路因諭

令再行酌量如自度能從馬爾邦直進即三千兵亦不必撥否則速行如數撥往宜喜應用計此數次奏摺與諭旨往來展轉已一月矣行軍勢懸呼吸豈容如此羈延計富德初接阿桂調兵之札不過在正月二十以外彼時即不能照依所調全數撥往亦應一面迅速具奏一面抽兵三千即行發往若果如此則是以國事為重不存畛域朕必嘉許之乃富德不但不即奏辦且於三十二千雙請之時似欲候朕批答

再行照辦似此延悞匝月富德已咎無可辭矣叅贊大臣遇應辦軍務原不妨與將軍彼此商酌若叅贊有觀望悞公之處將軍亦應隨時劾奏乃阿桂奏止言富德混撥兵數之非而於此一節轉不查叅實屬非是著傳諭阿桂將富德不即發兵前後遲悞緣由迅速查明據實叅奏現在各路進攻實惟阿桂一路最為可恃且阿桂所攻之西路碉非不多路非不險而阿桂節節仰攻層層越險所至克捷今距噶爾丹

廟及勒烏圍不過七八里實非明亮富德等所能及
伊等返衷自思亦當各知愧恧設使阿桂此時頓兵
不前并羅博瓦格魯瓦覺尚未能過亦如富德之阻
於庚額特而不進朕必治阿桂之罪功過具在難掩
衆人耳目並非朕偏向阿桂過於獎譽之也朕此時
所盼實惟阿桂一路統兵速進擣穴擒渠著傳諭阿
桂即速妥籌進剿迅成大功以膺懋賞

辛丑富勒渾奏言據脫出番人薩納等供有逆首

欲從美卧溝潛出搶奪叨烏又格魯瓦覺糧臺初
六日二更約有賊數百人攻撲木城官兵奮擊奔
竄臣查後路一帶山徑延長處處毗連賊境自應
酌調官兵數千名分布後路奏入

上諭軍機大臣曰富勒渾所奏殊不可解昨歲阿桂自
谷噶一路進攻業將各後路應行防守之兵分撥周
妥且阿桂屢次克捷采入賊境止須扼要堵禦向者
所慮賊匪潛軼分歧之路自應漸減於前何轉欲添

兵分守況現在功屆垂成復於後路添調防兵殊非
情理若因初六夜賊番數百潛撲格魯瓦覺糧臺遂
籌及加添兵力尤為可笑賊番偷劫臺卡乃其常技
各路軍營皆有之今勢當窮蹙不過為挺而走險之
計亦類於窮獸反噬更無足怪昨阿桂一路即有五
處同時滋擾俱經官兵勦擊殲死今格魯瓦覺之賊
復經官兵奮擊生擒其二殺傷者亦多賊衆自益計
窮胆落富勒渾惟當嚴密防守勿稍疎懈若因此遽

議添兵幾成風聲鶴唳不且為賊番所竊笑乎富勒渾本係拘謹之人未諳軍旅此等調兵奏牘豈竟未商之阿桂耶前日阿桂請調兵六千係備宜喜進攻之用今富勒渾復請調兵五千分布後路又在阿桂所調六千之外各省安得如許兵丁供川省調派乎設使後路果欲派兵昨歲即當籌議不應遲至大功將成之際復計及此總覺不成事體著傳諭阿桂即速查明富勒渾因何忽有此奏并查後路有無另須

抽減增併之處悉心熟籌妥辦具奏

上又諭軍機大臣曰前因阿桂奏請於隣近川省之陝甘貴州三省挑兵六千名應用雖經降旨允行繼思阿桂所稱現調之兵仍係各省咨回空缺未必能募補足數至舊兵傷病回營者亦未必即能就痊充用今據富勒渾奏請於各省挑兵五六千名迅往川省軍營應用其言未當於理固不足信但前日阿桂既請調兵今富勒渾復有此奏或該各省果有堪調之

兵即料理發往亦無不可著再傳諭勒爾謹畢沅章
謙恒等務各就該省實情迅速熟籌如尚有可撥之
兵趕緊選派起程仍咨阿桂聽其派赴何路備用

甲辰桂林奏言臣接富德來札知南路抽兵前赴
宜喜軍行必須糧隨當此會師掩襲沿途支應尤
須妥速以合機宜即同李世傑李本逐一密為籌
備茲復接札稱現在先抽大營兵二千名後路兵
一千名交興兆帶領剋日起程臣查自綏布以至

宜喜計程約有二十餘站此時兵行迅速概令裹
帶未免有礙趨行查自絨布啓行必先歷章谷之
格藏橋等處以達吉地丹東此十餘站原設糧員
自應按日支領以節長途攜帶之勞并令李世傑
前赴吉地李本即在丹東率同妥辦

同日文綬奏言臣准阿桂咨送奏稿酌調川兵三
千以備另路之用查本省額兵除各路軍營後路
糧站及派駐臺藏馳遞摺報並逃潰未出各兵存

營已屬無多而養傷未愈者亦尚不少此次調派

之兵應於舊存健兵內盡數挑派但川省現辦軍

務各處邊地卡隘巡哨防守以及内地塘汛看守

城池倉庫護解餉餉人犯查拏匪押送各路鉛

彈火藥軍裝在在需兵派遣竊思各省征兵凡在

木果木案內未出及發遣革除潰兵并在營脫逃

兵丁前奉

諭旨將額缺虛懸俟大功告成另行核辦統計川省缺

額兵一千四百餘名未經募補查前此召募新兵
因係臨時召募即赴軍營未經訓練是以不甚得
力臣查各兵之弟兄子姪不無力強年壯之人若
於此中挑選自更得力即或其中未經操練純熟
即以新兵留在內地當差而以舊兵撥往軍營自
內外均為有益現於各鎮標協營共派出兵三千
名前往應用至各兵所需鳥鎗腰刀查前年陝甘
弁送來川尚有餘存足供添用均奉入

上諭軍機大臣曰桂林奏沿途備給軍糧所辦甚好此項抽撥之三千兵想已自綏布起行又據文綬奏川省存營兵三千亦已如數挑足並據畢沅奏西安挑兵二千現已足數起程看來甘肅貴州兩省之兵諒亦挑派發往通計添兵又有九千阿桂惟當妥速籌辦以副廩念至明亮等一路既有南路兵三千再添川兵三千合之宜喜日旁原有兵內抽撥數千得兵約可滿萬如阿桂前日所籌繞越截攻之計自非難

事明亮等惟當竭力速辦剋日集勲

丙午阿桂豐昇額色布騰巴爾珠爾奏言臣等欽奉

諭旨查詢查臣等因賊碉高大人力難攀是以製有長梯或將獨木鑿為層級或將木植紮成借勢騰踴而上是以進攻官兵先擣梯以往及至碉根火器營鳥鎗翎長穆克發布首先搶上被石擊墜仍復躍起上碉而健銳營前鋒阿爾納阿即於穆克登

布陛下之時接續搶上均為勇敢臣等於前另摺
內已請將此二員授為額外前鋒校護軍校以示
鼓勵奏入報

聞

己酉富德奏言本月十五日遊擊田藍玉將自深
嘉卜投出金川番人僧格解赴來營臣察其辭色
可疑反覆究詰加以刑訊始供索諾木等遺令假
裝投出探看此路大營并各山梁營卡官兵多寡

及糧臺火藥處所以便由穆谷等處前來潛行滋擾且供將軍阿桂明亮處索諾木亦令人偵探後路又遣伊赴巴旺布拉克底叩見土司土婦等語至十八日又有羊子嶺投出番人舍邦臣如前嚴訊亦供索諾木遣來陋探此路大兵并離間巴旺布拉克底及探聽前所差僧格信息臣即將該犯等所供情節飛咨各路將軍及各後路糧員留心防範恐將軍處有掣獲同黨賊番尚須質對暫將

該番留營嚴錮俟奉到

諭旨再行正法

同日富德又奏言臣遵

旨抽撥南路兵丁星赴宜喜隨飛飭駐防丹東吉地章
谷等處副都統永平道銜李本督辦糧運桂林等
作速妥備揀派勇幹員弁即帶兵五百名前赴宜
喜臣隨在絨布各山梁營卡兵丁內揀選吉林兵
一百名索倫兵一百名健銳營兵一百名荊州滿

兵七百名雲南兵二百名湖廣兵八百名共抽撥
兵二千名派荊州將軍興兆統領前往於十六日
按隊起程馳赴宜喜以備進剿復添派荊州湖廣
兵一千名接續前隊於二十一日全數起程其丹
東吉地之兵據永平李本等覆稱抽兵五百名定
於本月十六日至丹東會齊十七日由彼起程侍
衛烏爾圖納遜帶往又據桂林覆稱章谷寶存兵
五百三十五名除分派稽防各縣要兵丁二百八十

四名難以抽撥外餘兵二百五十一名現已全行
抽出派都司彭子亮十六日起程帶赴吉地等處
俟大營官兵到時轉交帶領前進再查緘布一路
各山梁要隘營卡之兵既經抽減須較前更為嚴
防臣隨與各領隊大臣等悉心籌酌視其要隘形
勝彼此可互相應援者即將營卡歸併合計兵數
多寡妥為安置如意防範均奏入

上諭軍機大臣曰富德究出假詐細作賊番訊供奏聞

所辦甚好各路投出番人頗多惟阿桂處前日盤獲
奸細一名今富德又盤獲二名此等賊番踪跡詭秘
甚難辦別富德於降番到營察其詞色可疑即詳悉
跟究果得實情甚屬可嘉富德著賞給小荷包四枚
以示優獎至前此因富德不即撥兵前往宜喜曾傳
旨申飭今據奏已抽兵三千派員帶領陸續起程是
南路之兵已經抽撥三千富德於此事尚無過悞至
南路抽撥兵三千計可漸次到明亮處其丹東吉地

章谷等處亦得兵七百五十餘名若將所派川兵三千一併調往約可得兵七千再將帶石等處之兵抽選數十帶往幾可滿萬豈尚不能由宜喜進攻明亮自應及早籌畫令舒常統兵留駐帶石親身遄往宜喜速圖進取又閻僧格等供詞稱逆酋等遣令來營密囑踴看虛實及堆放米糧鉛彈之處以備偷劫放火其情已屬可惡並稱逆酋囑以若將汝交給巴旺布拉克底即向土司土婦處叩頭并令向土婦說我

兩家原是親戚因何隨天朝大人各處散給字帖將我百姓擾亂此時若不回顧我們將來大兵撤去便來勦滅等語其意竟欲恐嚇巴旺布拉克底之人暗懷疑慮不肯認真出力賊計險毒實堪切齒幸而已經破露未能隱售其奸否則大有關係可見金川賊衆必當速滅斷不可稍存姑息將軍叅贊等宜共知此意努力速辦所有盤獲之僧格舍邦二名現無可質訊之處著富德將二犯即在營外凌遲處死示衆

令賊知奸細被獲正法以破其膽又訊供有派撒爾
里寨番人一名得木通普魯一名實格里讓絅又派
布拉克底寨番人一名札木則普魯一名格什古木
爾甲現在欲往西路北路探聽事情等語阿桂一路
如果有奸細前往自能立時盤獲惟明亮舒常處從
未曾盤得一人總由素未閱歷不能察見奸宄恐果
有奸細往彼明亮等為其所愚闊係非小此等奸細
到營投降其誠偽情節在微茫之間然與其過信無

寧過疑若見有形踪可疑者細詰不吐實情即當加以刑訊設或慮降番聞而畏阻亦屬無妨大兵現已逼近賊巢即日掃穴擒渠所有逆黨諸番更不慮其他竄又何必爭一時之急於降附乎著傳諭明亮舒常加倍留心盤詰毋稍疎忽

同日顏希深奏言查南路協濟米漸已運竣計木池所存祇可敷月餘之需該處係烏拉馳運春初水草未茂兼路遙站險籌辦宜早臣札知臬司李

世傑於二月起每月酌撥打箭爐倉米四千石以資接濟並為將來會攻達爾圖之用至北路糧儲仍飭由卓克采每日運進三四百石以供帶石周叟軍糧并可備南路米石未到之前酌運宜喜等處不致缺乏奏入報

聞

辛亥文綬奏言查西路軍營及附近各站現存米五萬餘石檄砥存米七千餘石卓克采存米一萬

餘石木池存米二千餘石今南路撥兵前赴宜喜
又有調往川兵共添兵六千軍糧尤須充裕已飭
令臬司李世傑等于吉地撥米二千石星速趕運
又打箭爐現存米三萬餘石亦經預飭撥米五千
石雇覓烏拉運往木池協濟宜喜臣又恐時甫春
半各土司烏拉尚未離巢或有遲滯一面咨商鄂
寶劉秉恬將椒砥卓克采等處存米多為滾運以
裕儲備如此分頭趕辦宜喜軍糧實可無虞短少

奏入

上嘉之

平定兩金川方畧卷一百十四